

Protocol

dalla seduta dil cussegl da vischnaunca,
gliendisdis, ils 29 da settember 2025: allas 20⁰⁰ – 22²²
Liug: Halla Cons

Presidi: Adrian Flepp

Actuar: Ervin Maissen

Presents:

- | | | |
|-----------------------------|--|---|
| a) Cussegl | Silvia Bucheli-Caduff
Theres Burri Gadola
Silvio Candinas
Felicia Deflorin
Adrian Flepp
Placi Flury | Remo Huonder
Admir Jasarevic
Rafael Maissen
Alfred Spescha
Ignaz Venzin |
| perstgisas | Otmar Flepp
Giusep Lozza | Christian Loretz
Lucas Lutz |
| b) Suprastonza
communala | René Epp
Clemens Berther
Wendelin Jacomet | Jris Lombris
Paul Flurin Schmidt |
| c) Cader | Roland Cajacob, meinafatschenta
Urban Maissen, menader infrastruttura e baghegiar | |

Tractandas:

1. Revisiun totala dalla planisaziun locala – Part dils habitadis (plans 1:2000) e lescha da baghegiar (messadi 10-2025/2028)
2. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér

Adrian Flepp
president

Ervin Maissen
actuar

1. Revisiun totala dalla planisaziun locala - Part dils habitadis (Plans 1:2000) e lescha da baghegiar (messadi 10-2025/2028)

President dil cussegl da vischnaunca

Questa sera cuntinuescha il cussegl da vischnaunca cun la tractaziun dil project per la revisiun totala dalla planisaziun locala - Part dils habitadis (Plans 1:2000) e dalla lescha da baghegiar, oz cun la revisiun totala dalla lescha da baghegiar. Nossa planisadra vegn a presentar ils puncts centrals dalla revisiun dalla lescha da baghegiar, silsunter succeda la discussiun generala davart la lescha da baghegiar e lu la discussiun en detagl. Davart propostas vegn mintgamai decidiu immediat.

Avon la votaziun finala vegn dau la pusseivladad da revegnir era al plan da zonas.

Presentaziun

Part 1: Plan da zonas

Nossa planisadra *Esther Casanova* dilucidescha las midadas centralas en connex cun la revisiun totala dalla lescha da baghegiar.

Debatta d'entrada

Dalla discussiun generala vegn buca fatg diever, aschia ch'igl ei decidiu d'entrar e tractar la lescha da baghegiar en detagl.

Deliberaziun en detagl

Art. 21 Schema da zonas

Cussegliaer Rafael Maissen

Propona d'alzar la cefra d'utilisaziun (CU) per las zonas da habitar mischedadas HM2 e HM3 e las zonas da habitar H1, H2, H3, H4 viers la lescha vertenta per 0.10 e buca mo per 0.05. Cun quei fuss ei pusseivel da nezegiar meglier il terrena von maun. Ulteriuramein vegnes la CU era adattar alla CU tenor la lescha da baghegiar dalla vischnaunca da Tujetsch ch'ei era pli aulta. Ulteriuramein vegness quei era encunter alla pretensiun dil dretg surordinau da construir pli cumpact.

Planisadra

La proposta para attractiva, las consequenzas vesan ins denton pér sil pli tard cura ch'ils profils ein tschentai. Per leu vesan ins che quella sligiazion cun augmentar la CU secumporta buca culs baghetgs vischins ch'ei vegni realisai tenor il dretg vertent. Gia oz ei la CU cun las dimensiuns definidas ella lescha da baghegiar pli aulta che la norma usitada definida per las singulas zonas d da baghegiar. In ulteriur fatg negativ ei che la reserva da habitar tenor project da revisiun da 300 habitonts s'augmentass sin 330 habitonts. Era sch'il svilup dalla populaziun para actualmeindad esser positivs quantan ins mo cun in augment moderau da ca. 37 personas. Igl augment mudest dalla cefra d'utilisaziun tegn quen alla midada da sistem definida el dretg cantunal che la vischnaunca ei obligada da surprendre cun la revisiun dalla lescha da baghegiar. Quei augment moderau sa vegnir argumentada enviers il cantun. Per in augment pli grond dat ei negins arguments plausibels per argumentar enviers il cantun in augment dalla CU. Ulteriuramein teness in augment dalla CU buca quen als basegns dil maletg dil liug. La situaziun da Mustér e da Tujetsch selaian buca cumparegliar, tonpli che la vischnaunca da Tujetsch applicava excepziuns tier la calculaziun dalla CU che la vischnaunca da Mustér ha mai enconuschiu. Consequentamein ha la vischnaunca da Tujetsch stuiu alzar la CU per vegnir pli datier allas pretensiuns dil dretg cantunal.

Suprastonza communal

Cun augmentar la CU vegn la pusseivladad da construir ina casa d'ina famiglia reducida ni schizun impedida. Gia oz ei grev da contonscher cun ina casa d'ina famiglia la CU minimala definida. El futur ei la CU minimala d'ademplier per 80% consequentamein eis ei necessari da construir en relaziun cun la CU, casas pli grondas tgei che caschuna cuosts da baghegiar supplementars. Casas pli grondas caschunan cuosts pli aults, consequentamein sereducescha la pusseivladad da construir ina casa per ina famiglia muort las finanzas che lubeschan buca pli la realisaziun d'ina casa tala casa.

Cussegl da vischnaunca

Igl exempel dalla casa d'ina famiglia che stuess muort igl augment dalla CU aunc vegnir pli gronda ed entras quei aunc pli cara para dad esser plausibels. Ord in augment dalla CU duess buca seresultar ch'il cussegl impedess el futur muort las prescripziuns dalla CU minimala la realisaziun da casas d'ina famiglia.

Tgei CU maximala ei pil pli usitada? Tgei argument ha il cantun fatg valer cun caschun dalla preexaminaziun da buca alzar la CU? Fuss ei per exempel pusseivel da reducir la cumpart minimala per ademplier la CU da 80% sin 70%?

Planisadra

Da principi dat ei negina regla fixa per fixar la CU. Denton eis usitau da definir per la zona da habitar H2 ina CU da 0.50. Cun ina cefra d'utilisaziun da 0.55 essen nus pia gia oz cun la lescha vertenta sur la CU usitada per ina zona da habitar H2. Cun ina CU da 0.60 essen nus pia ca. 20% pli ault che quei ch'ei usitau ella zona da habitar H2.

El rapport da preexaminaziun fa igl uffeci attents d'ina vart sin las consequenzas davart il maletg dil liug e da l'autra vart sin las consequenzas pertuccont las reservas da terren da baghegiar. Perquei ha la suprastonza communal reponderau igl augment dalla CU previus pil rapport da preexaminaziun e tschercau ina sligiazion da cumpromiss. Igl augment dalla cefra d'utilisaziun ha per consequenza ch'ei stat a disposiziun pli bia terren da baghegiar, consequentamein s'augmentass la cefra da habitonts che vegn risguardada per calcular las reservas da terren da baghegiar aunc pli fetg. In augment da 20 % selai buca argumentar plausiblamein enviers il cantun cun quei che nus essen gia oz considerablamein sur la reserva previda sin fundament dil plan directiv ed il svilup dalla populaziun.

Ina reducziun dalla cumpart minimala vid la CU dad 80% sin 70% ei buca pusseivla. Quella cumpart ei definida el plan directiv dil cantun, ulteriuramein ei quella indicada sut art. 19c al. 3 dalla lescha davart il svilup dil territori pil cantun Grischun (LPTGR) sco suonda: « *L'obligaziun da surbaghegiar vala sco ademplita, sche la dimensiun maximala dall'utilisaziun admissibla ei exaurida per silmeins 80 pertschien enteifer il termin.* »

Cussegl da vischnaunca

La proposta dalla suprastonza communal d'augmentar mo moderadamein la CU selai argumentar. A vesta dil rapport da preexaminaziun fai buca senn d'augmentar la CU pli fetg che proponiu tenor il sboz dalla lescha. Il cussegl da vischnaunca duei perquei suandar la proposta dalla suprastonza communal.

Suprastonza communal

Cugl augment dalla CU per 20% ha la suprastonza communal era vuliu provocar da lezzas uras il meini dil cantun. La posiziun dil cantun concernent in augment dalla CU ei clars. La sligiazion presentada al cussegl ei ina sligiazion da cumpromiss ch'ei era vegnida discussiunada cun ils iniziants e duess era esser supportabla per lez. La pratica muossa gia oz ch'igl ei grev da contonscher la CU minimala. Cun in augment dalla CU vegn quella finamira ulteriuramein engraviada. Ina cumparegliaziun cun autras vischnauncas ei greva tonpli che quella risguarda buca las atgnadads che quellas han applicau entochen oz tenor dretg communal.

Cussegl da vischnaunca

Las reservas en quartiers existents giustificieschan buca in augment surproporziunau dalla CU. Sch'ins risguarda da niev per mintga alzada in augment da 20 cm van las indicaziuns el schema da zonas buca si, eis ei evtl. capatau cheu ins sbagl ella cumparegliaziun?

La nova basa per calcular la CU tenor dretg cantunal duess possibilitar da saver realisar las medemas surfatschas ch'eran pusseivlas tenor dretg vertent.

Planisadra

Tier la cumparegliaziun dallas altezias ei capatau in sbagl. Ins ha lu cumparegliau cun las cefras ch'ein stadas en la preexaminaziun. En quei senn ein quellas cefras da curreger. Da niev vegnan las surfatschas accessorias NNF risguardadas empau auter, perquei fa in augment dalla CU per 0.05 senn.

Suprastonza communal

Las prescripziuns da baghegiar duein buca mo possibilitar als novs patrums in utilisaziun optimala da lur terren da baghegiar, mobein era tener quen al fatg che quels che han gia surbaghegiu lur terren han giu dad observar las prescripziuns da baghegiar lu vertentas.

En in cass concret havess in proprietari da terren ad Acletta buca pli giu la pusseivladad da baghegiar la casa ch'el ha realisau avon paucs onns sche la CU havess stuiu vegnir ademplida tenor niev dretg cun in alzament dalla CU.

Votaziun

Cun 3 encunter 8 vuschs e 0 abstenziuns decida il cussegl da vischnaunca da mantener la cefra d'utilisaziun tenor proposta dalla suprastonza communal.

Art. 29 al. 4 Zona Centrala

Art. 30 al. 3 Zona dil vitg

Cussegliera Theres Buri

Setracta ei cheu buca d'ina cuntradicziun tiegl art. 8 al. 3. Tenor art. 8 al. 3 surpren la vischnaunca ils cuosts per l'emprema posiziun dalla cussegliaziun da baghegiar, tenor art. 29 al. 4 vegnan ils cuosts per la cussegliaziun da baghegiar adossai al patrun da baghegiar. Quei para da semorder. Ella propona da strihar la davosa construcziun dils art. 29 al. 4 e digl art. 30 al. 3.

Planisadra

Tenor art. 96 al. 1 LPTGR han ils patrums da construcziun da surprendre tut ils cuosts che seresultan en connex cun ina procedura da baghegiar, pia era ils cuosts dalla cussegliaziun da baghegiar.

Cussegl da vischnaunca

Tonpli fuss la situaziun pli clara sche la davosa construcziun dils art. 29 al. 4 ed art. 30 al. 3 vegnan strihadas. Cunquei ch'ins sa sebasar sin dretg cantunal, caschuna ei neginas cuntradicziuns enteifer il dretg communal.

Votaziun

Cun 11 encunter 0 vusch e 0 abstenziuns decida il cussegl da vischnaunca da mintgamai strihar la davosa construcziun digl art. 29 al. 4 ed art. 30 al. 3.

La construcziun «*Ils cuosts per la cussegliaziun vegnan adossai al patrun da baghegiar*» vegn mintgamai strihada els art. 29 al. 4 ed art. 30 al. 3.

Art. 33 al. 2

Cussegl da vischnaunca

Pertgei vegn quella parcella numnada explizit egl artechel dalla lescha da baghegiar? Ei quei propi necessari?

Planisadra

Quella parcella vegn attribuida da niev dalla zona da mistregn en ina zona da habitar mischedada. Cun quei s'augmenta la valeta da quei schischom considerablamein. A vesta da quella plivalur duei sin quei terren vegnir realisau ina cumpart minimala da habitaziuns pintgas.

Suprastonza communal

Quella grevezia han aunc autras parcellas las quala vegnan zonadas entuorn. Quellas ein denton definidas ell'annexa 3 tier la lescha da baghegiar, resp. definidas corrispudentamein el plan da zonas. A Mustér exista ina munconza da habitaziuns pintgas

Art. 64 Areal per habitaziuns pintga

Cussegliaer Rafael Maissen

Propona d'adattar igl artechel 64 suandontamein:

Il tetel digl artechel duei vegnir adattaus enstagl d'areal per habitaziuns pintga

alineia 1

Igl areal per habitaziuns pintgas ei destinaus per la construcziun da habitaziuns pintgas duei vegnir strihaus

alineia 2

La noziun Enteifer quei areal definiu..... duei vegnir remplazzada entras Enteifer il spazi definiu astga....

litr. d

litr. d duei vegnir formulada entuorn suandontamein;

Per habitaziuns pintgas astga vegnir creau negina proprietad da condomini. Quella restricziun vegn cun disponer la lubientscha da baghegiar menziunada el cudisch funsil.

En cumbinaziun cun art. 64 duei l'annexa 3 tier la lescha da baghegiar vegnir adattada suandontamein:

Per las parcellas 588, 591, 2201 e 2204

El rom dalla planisaziun da quartier eis ei da reglar il suandont

15% enstagl da 30% dalla surfatscha maximalmein utilisabla (aGF) ei da realisar sco habitaziuns pintgas cun ina surfatscha principala (HNF) da maximalmein 50 m².

La damonda suenter habitaziuns pintgas para buca dad esser talmein gronda, ch'ins stuess pretender per quellas parcellas mintgamai ina cumpart minimala da 30% habitaziuns pintgas. Per quei duei quei quella cumpart vegnir reducida sin 15%. Plinavon setschenta la damonda, schebein personas attempadas che sesanflan buca el process da lavur astgan far diever da quellas habitaziuns pintgas. En quei senn para la definiziun sut litr. c dad esser empau strentga. Ulteriuramein setschenta la damonda davart l'interpretaziun concernent l'activitad da gudogn ella regiun.

Planisadra

La lescha da baghegiar ed il plan da zonas fuorman communablamein ina simbiosa. Las noziuns stipuladas el plan da zonas ein perquei era da duvrar ella lescha da baghegiar, perquei sa il tetel digl artechel buca semplamein vegnir midaus. La prescripziun concernent habitaziuns pintgas vala per ina part dil terren dalla Distec SA. Las parcelas definidas a Funs ed alla Via dalla Stampa basegnan ulteriuramein ina planisaziun consecutiva (planisaziun da quartier). Leu nua ch'ei vegn menau atras ina planisaziun consecutiva han ils proprietaris da terren ulteriuramein la pusseivladad da far diever d'in bonus da 10% tier la CU. In mix da habitaziuns survescha era ad ina buna qualitat da habitar enteifer ina surbaghegiada. Ei exista ulteriuramein negin termin enteifer il qual la cumpart da habitaziuns ei da realisar, igl ei sulettamein da tener quen alla dimensiun ch'ei definida ella lescha da baghegiar.

Persunas attempadas adempleschan tenor la planisadra il criteri sut litr. c ed astgan era far diever da quellas habitaziuns. Indirectamein retilan els lur entrada ella regiun. Impurtont ei che quellas persunas vivan cheu e che lur center da veta (Lebensmittelpunkt) sesanfla cheu. Leu nua ch'il terren vegn zonaus entuorn sedat ulteriuramein ina plivalur. La definiziun davart la cumpart dallas habitaziuns pintgas astga pia era vegnir taxada sco pintga cumpensaziun che sedat entras la plivalur sin fundament dalla midada da zona.

Suprastonza communal

La damonda davart habitaziuns pintgas per luvriers e per stagiunaris ei fetg gronda. Aschia tscherchan la Distec, la branscha da construcziun e buca il davos era la branscha turistica intensivamein habitaziuns per lur collaboraturs ell'entira regiun. Suenter discussiuns divergentas davart la dimensiun da habitaziuns ha la suprastonza communal schau elaborar ina retscherca neutrala davart ils basegns. La retscherca vegn tier la conclusiun ch'ei basegni habitaziuns cun suandontas cumparts da habitaziuns, 40% habitaziuns dad 1 ½ entochen 2 stanzas, 40% habitaziuns da 3 ½ stanza e 20% habitaziuns pli grondas per famiglias. Cun excepziun dallas pendicularas vegn actualmein construì praticamein mo habitaziuns da 3 ½ stanza. Ulteriuramein manca il diember necessari da habitaziuns che san vegnir affittadas. Era cun risguard sin quei fatg ei la definiziun dalla grondezia dallas habitaziuns necessaria. Pia ei la cumpart da 30% habitaziuns pintgas definida ella lescha da baghegiar anzi plitost bassa enviers il basegns ch'ins ha saviu erui. La grevezia che po sedar pil singul proprietari da terren para dad esser supportabla.

Planisadra

Ins sa s'accordar da remplazzar sut al. 2 igl areal cun la noziun spazi; *Enteifer il spazi definiu per habitaziuns pintgas astga sut las cundiziuns suandontas, ... e lu litr. d Per las habitaziuns pintgas astga vegnir creau negina proprietad da condomini.*

Votaziun

Cun 1 encunter 8 vuschs e 2 abstenziuns decida il cussegl da vischnaunca da mantener igl art. 64 dalla lescha da baghegiar cun sura adattaziuns tenor la proposta dalla suprastonza communal.

Art. 73 sector casa da habitar menader menaschi agricol

Cussegl da vischnaunca

Quei artechel para dad esser ina buna soluziun. Cunzun era leu nua ch'ins sto quintar ch'in menaschi vegn sligliaus si e la casa vegn utilisada per in auter intent che pil qual ella ei vegnida lubida resp. construida.

Planisadra

Cheu setracti evtl. d'ina malcapientscha. Gl'intent ei da possibilitar al menader dil menaschi la pusseivladad da construir ina casa ella zona da baghegiar e da mantener quei schischom per quei intent. Quellas parcelas vegnan buca mobilisadas ein denton reservadas per gl'intent specific stipulaus el plan da zonas ed ella lescha da baghegiar. Menaschis purils astgan denton baghegiar ina casa pil diever dil menaschi ella zona agricola sch'ils criteris corrispundents ein adempli. Vegn in menaschi denton sligiaussi ha la vischnaunca actualmein paucas pusseivladads d'intervegnir.

Art. 100 al. 3 Segirtad dil traffic

Cusseglier Placi Flury

Propona d'adattar la davosa construcziun digl art. 100 al. 3 suandontamein:

Sche las munconzas vegnan buca remediadas, lai l'istanza da baghegiar exequir las mesiras necessarias sin ~~lar~~ donn e cuost dil proprietari pertuccau.

Votaziun

Cun 7 encunter 3 vuschs e 1 abstenziun suonda il cussegl da vischnaunca la proposta da cusseglier Placi Flury per adattar la davosa construcziun digl al.3.

Art. 104 al. 4 Conducts

Votaziun

Cun 11 encunter 0 vuschs e 0 abstenziuns suonda il cussegl da vischnaunca la proposta da cusseglier Placi Flury da cumpletar igl alinea cun la noziun 10 onns.

President dil cussegl da vischnaunca

Dat la pusseivladad da revegnir al plan da zonas ed al plan general da formaziun 1:2'000 part habitadis ed alla lescha da baghegiar. Cunquei che negin giavischa da revegnir passa el tier la votaziun finala.

Votaziun, finala

Cun 10 encunter 0 vuschs e 1 abstenziun decida il cussegl da vischnaunca:

1. D'approbar la revisiun totala dalla planisaziun locala concernent:
 - a. Il plan da zonas e plan general da formaziun 1:2000 Acletta/Funs, Disentis, Faltscharidas, Segnas, Buretsch, Peisel, Cuoz, Mumpé Medel, Clavaniev;
 - b. Il plan da zonas e plan general da formaziun 1:2000 Disla, Cavardiras, Pardomat Dadens, Madernal, Mumpé Tujetsch e
 - c. La lescha da baghegiar.
2. Da suttametter il conclus dil cussegl da vischnaunca el senn dallas prescripziuns digl art. 48 al. 1 dalla lescha cantunala davart il svilup dil territori e digl art. 11 al. 1 dalla lescha da baghegiar alla cuminonza dils votants.

Cussegl da vischnaunca Disentis/Mustér

Adrian Flepp
president

Ervin Maissen
actuar

2. Ura da damondas

Alla suprastanza communal ei vegniu inoltrau treis damondas a scret. La suprastanza communal pren posiziun sin suandontas damondas ord il miez dil cussegl da vischnaunca.

Cusseglia Ignaz Venzin

Damonda:

En casa da scola a Cons ei vegniu fatg mesiraziuns da radon el decuors dils davos meins. Bugen udessel co ei vesa ora culs resultats dallas mesiraziuns e tgei mesiras ein necessarias. Gest tenor ils resultats ein las pretensiuns gie fetg differentas ed han influenza sils cuosts per mitigiar la situaziun?

Risposta (geraua Jris Lombris-Manetsch):

La fin digl onn vargau ha la suprastanza communal surdau alla firma Amhert und Walther da s. Gagl l'incumbensa d'analisar la situaziun da radon en nossa scola.

Las mesiraziuns e l'analisa han la finala cuzzau pli ditg che previu e pér l'entschatta zercladur ei vegniu presentau a nus ils resultats da quella lavur e las mesiras urgentas per mitigiar l'influenza dil radon en nossa scola. A quella presentaziun ei era staus presents persunalmein sgr. Stefan Näf digl uffeci per la segirtad da victualias e sanadad d'animals dil Grischun.

Cun scriver dils 10-06-25 ha sgr. Näf lu confirmau a nus a scret las mesiras che nus vein previu sco mesiras urgentas:

Contaminau fetg ni ualti fetg ein las stanzas:

- a) Scola nova – stanzas da zambergiar cun lenn e metal
Sanaziun cun installaziun d'ina ventilaziun speciala
- b) Scoletta
Plaunterren: sanaziun cun installaziun d'ina ventilaziun speciala
- c) Scola veglia: locals da zambergiar
Midada d'intent, v.d. pil mument negina instrucziun en leu, vegn duvrau mo sco magasin d'uorden
- d) Biblioteca:
cuntinuar cun luftegiar bein e mesiraziuns da radon
- e) Halla Cons: local da giuventetgna
Cuntinuar cun luftegiar bein e mesiraziun da radon
- f) Halla Cons: halla da gimnastica
La ventilaziun ha saviu vegnir optimada ed aschia sa vegnir ventilau dafertontier l'aria tenor basegns

Quellas mesiras d'urgenza cumpeglian pia mo las stanzas culla pli aulta concentrasiun da radon. E nus havein survegniu la lubientscha per quellas moderadas mesiras mo sut la cundiziun che nossa scola vegn sanada sil pli tard entuorn igl onn 2030. Ed en tutta cass stuein nus lu prender tut las mesiras effizientas per mitigiar ni insumma ragischar ora l'influenza dil radon en nossa scola.

Il zercladur ha la suprastanza communal concediu per la sanaziun urgenta in credit posteriur da frs. 65'000.- e las lavurs da sanaziun han liug durant las vacanzas d'atun 2025, pia l'autra jamna. La suprastanza ei pertscharta che nus essan responsabels per la sanadad da nos affons e nies persunal da scola.

Igl entir process ei vegnius accompignaus e controllaus digl anteriur president dil cussegl da scola Simon Bergamin. El ha fatg quei tut voluntari ed ha perfin semtgau 2 presentaziuns da powerpoint per ina megliera survesta. Ad el sei era d'engraziar che nus savein mo far ina sanaziun parziala e stuein buca gest sanar tuts plantschius el plaunterren, quei era en vesta ad ina sanaziun totala da nossa scola. L'jamna vargada ei Simon aunc staus en scola ed ha presentau leu a tuttas las mesiras previdas. Da cheu anora less jeu engraziar zun fetg al Simon per sia grondiusa lavur, quei tut senza indemnisaziun.

Damondas a bucca

Ei vegn desistiu da tschentar damondas a bucca.

Communicaziuns

Gerau Paul Schmidt

Informescha ch'ei seigi vegniu intervegnu el cass digl auto starschau e ch'ei seigi vegniu communicau al pertuccau in termin entochen la fin november d'allontanar il vehichel.

President communal

Fa attents al termin dils 31 d'october 2025 nua ch'igl ei previu ina sera d'orientaziun davart la strategia futura dalla vischnaunca.

President dil cussegl da vischnaunca

Supplichescha ils presents da reservar ils 23 d'october 2025 in termin per ina proxima seduta dil cussegl da vischnaunca. Ei vegn communicau proximamein, schebein la seduta ha liug definitivamein.

Cussegl da vischnaunca Disentis/Mustér

Il president:



Adrian Flepp

Igl actuar:



Ervin Maissen

Disentis/Mustér, ils 9 d'october 2025